

**Jean-Marc COURBET**

**PROUJÈT FREDERI**

**Un raconte dóu coumessàri Sant-Aloi**

*A Silvio*

### **Prefàci**

Jan-Marc Courbet, emé Proujèt Frederi, coume li bon journalisto, a encamba lou gaudre que desseparo lou repourtage d'atualita de l'istòri roumanesco.

Sus la ribo de l'imaginàri a pamens garda soun gàubi naturau de maneja la lengo, e a sachu n'en faire sourgenta l'escrituro couladisso qu'emporto tout lou recit.

Lou Proujèt Frederi es tambèn uno escoumesso pèr un jouine escrivan prouvençau.

D'efèt, escrieure soun proumié rouman, en deforo de la grando tradicioun prouvençalisto, de la man d'eila dóu classissime bourgés di saberu prouvençau dóu gros grun, es prene lou risque de la critico desdegnouso.

En militant courajous Jan-Marc Courbet a pas agu pòu de la dificulta, e s'es manda à l'aigo dins un gènre di mai mouderne, lou rouman d'espionnage.

Segur dins uno literaturo prouvençalo marginalisado pèr la pouèsio fecoundo, emé li vieiis escolo impasant toujour si dòumo, es maleisa de retrouba soun tèms. Jan-Marc Courbet a pas bataia au mitan. Noste parla pòu tout dire e a fa la provo que s'asatavo naturalamen à tóuti li situacioun. Jougant abilamen emé li mot nouvèu e li perifraso bèn engaubiado, meno nosto lengo en plen dins la vido vidanto de vuei.

Lou merite tambèn de Jan-Marc Courbet es qu'escriéu pèr èstre legi. Se gargalejo pas emé lou recit de si souveni vo de sis estat d'amo. Basti d'aventuro pèr soun legèire, valènt-à-dire que se plego i goust dóu publi pèr expandi toujour que mai l'escrituro nosto.

Soun vertadié mètstre es Frederi, lou venerable maianen, mai soun moudèle d'aro es un autre Frederi, lou di ribo dóu lau Lemman, l'escrivan lou mai populàri de noste tèms, que lou tirage de si libre se fai en milioun d'eisemplàri, Frederi Dard, alias coumessàri Sant-Antòni.

Pamens Proujèt Frederi a rèn à vèire em'aquélis autour celèbre, es de bon uno aventuro óuriginalo dins lou mounde de l'espionnage emé un coumessàri Sant-Aloi bèn prouvençau que barrulo d'en pertout.

Se pòu pas desvela lou debana dóu raconte qu'acò levarié la sabour dóu libre, mai es segur que lou legèire sara estouna e ravi pèr la qualita de l'escrit e dóu recit.

Jan-Marc Courbet alias coumessàri Sant-Aloi a bèn encapa la draio mouderno pèr expandi à bódre l'escrituro prouvençalo.

Li mantenèire de la tradicioun literàri nosto finiran bèn pèr coumprene que i'a pas de grand vo de pichot sujèt. Mai eisistis de bon e de marrit rouman e touto distincion de gènre es perimado.

La jurado di Jo Flourau setenàri dóu Felibrige s'es pas enganado qu'a guierdouna lou rouman Proujèt Frederi pèr la Santo Estello de Nimes en 1990.

Bernat Giély

Majourau dóu Felibrige